

Perbadanan Labuan bantu promosi UMSKAL sebagai pusat pendidikan tinggi bertaraf antarabangsa

UB 27.10.2021 P. 04

LABUAN: Perbadanan Labuan menggalakkan sektor pendidikan tinggi sebagai salah satu daya tarikan ke Wilayah Persekutuan Labuan.

Pengerusi Perbadanan Labuan, Dato' Sri Amir Hussien berkata Perbadanan Labuan bertanggungjawab menggalakkan pelajar dari luar negara melanjutkan pengajian tinggi mereka di wilayah ini.

Justeru itu, beliau berkata, sebagai Pihak Berkuasa Tempatan (PBT), Perbadanan Labuan akan membantu mempromosikan Universiti Malaysia Sabah, Kampus Antarabangsa Labuan (UMSKAL) menjadi salah satu pusat pendidikan tinggi bertaraf antarabangsa.

"Perbadanan Labuan akan mempromosikan UMSKAL menjadi salah satu pusat pendidikan tinggi bertaraf antarabangsa dengan melihat peluang membawa masuk pelajar dari China, Timur Tengah dan negara-negara Asean," katanya.

Beliau berkata demikian ketika mengadakan perbincangan dengan Pemangku Pengarah UMSKAL, Profesor Madya Dr Mohamad Rizal Abdul Hamid di Bilik Mesyuarat Kiamas, Bangunan Menara UMSKAL, pada Isnin lalu.

Turut menghadiri perbincangan itu ialah Pengerusi Globalfront International Sdn Bhd, Dato Low Kok Thai, Naib Presiden Dewan Perniagaan Liu Sedunia Malaysia, Dato' Sri Simon Liew dan Timbalan Pengarah International Relationship, VISA and Promotion, UPSI, Prof Madya Dr Mohammed YM Mai.



UCAPAN: Amir memperkatakan sesuatu sempena perbincangan itu.



BENTANG: Dr Mohamad Rizal (kanan) ketika membentangkan mengenai pentadbiran dan akademik UMSKAL.

Hadir sama Ketua Pentadbiran UMSKAL, Zamri Mohamad Tuah, Pensyarah Fakulti Kewangan Antarabangsa Labuan (FKAL) dan Fakulti Komputeran dan Informatik (FKI).

Amir berkata, pihaknya berharap harapan besar itu akan menjadi kenyataan bagi memastikan ekonomi Labuan akan kembali pulih dan berkembang lebih pesat dengan kehadiran pelajar dan pensyarah dari luar negara.

Sementara itu, Dr Mohamad Rizal mengalu-alukan sokongan, komitmen dan kerjasama daripada jabatan dan agensi kerajaan serta pihak industri untuk merealisasikan harapan membawa masuk lebih ramai pelajar antarabangsa ke UMSKAL pada masa hadapan.

"UMSKAL yakin kehadiran pelajar dari dalam dan luar negara ke UMSKAL akan turut membantu menjana ekonomi Wilayah Persekutuan Labuan.



ALBUM: Amir (tiga kanan) dan Dr Mohamad Rizal (dua kanan) bersama pihak industri dan wakil UMSKAL.

"Malah industri pelancungan juga akan berkembang menerusi kehadiran pelajar dan pensyarah tempatan dan antarabangsa," katanya.

Jelas beliau, menerusi kehadiran pelajar luar negara akan membantu mempromosikan produk makanan dan budaya tempatan sekali gus memperkenalkan lagi Labuan di mata dunia.

Pada ketika ini, UMSKAL mempunyai 1,908 pelajar yang melanjutkan pengajian di FKAL dan FKI.



DISKUSI: Amir (kanan) dan Dr Mohamad Rizal (kiri) bersama wakil UMSKAL.